

Kekchi - Agape Santil Hu - God's Love Letter Scriptures

Juan 15:9 Jo' naq xinxra li Yuwa'b'ej, jo'kan ajwi' naq xexinra laa'in. Kanaaqex sa' linrahom.

Isaías 43:1 Anaqwan, jo'ka'in kixye li Qaawa', laj yoob'tesihom aawe, a Israel, laj winqob'resihom aawe, a Jakob: “Matxiwak xb'aan naq laa'in xatinkol; laa'in xink'ehok laak'ab'a', wehat chik.

Jeremías 1:5 “Naq toj maji' nakatsiyaak chaq rik'in laana', laa'in ak xinsik' chaq aawu; naq toj maji' nakatyo'laak, ak santob'resinb'ilat chaq inb'aan ut ak xaqab'anb'ilat cho'q xpropeet eb' li tenamit”, chan li Yos.

Juan 15:16 “Moko laa'ex ta xexsik'ok wu; laa'in b'an xinsik'ok eeru ut xexinxaqab' re texxik ut chi'uuchinq leepaab'aal, ut li taaruuchin leepaab'aal wanq chi junelik. Chi jo'kan chixjunil li teetz'aama chiru li Yuwa'b'ej sa' ink'ab'a', taak'eemanq eere.

3 Juan 1:2 At inrahom, ninnaw naq chaab'il yookat chi xk'amb'al laayu'am, ut nintijok chawix re naq kawaqat ut us chat-elq rik'in chixjunil.

Isaías 43:4 Xb'aan naq jwal loq'at cho'q we laa'in, q'axal tertó aatz'aq ut nakatinra. Tink'eheb' li poyanam ut eb' li tenamit cho'q aaweeqaj re xkolb'al laayu'am.

Jeremías 31:3 laa'in kink'utb'esi wib' chiru. Laa'in nakatinra rik'in rahom wank chi junelik; jo'kan naq junelik twuxtaana aawu.

Oseas 11:8 “Chanru naq tatinkanab', a Efraín? Chanru naq tatintz'eqtaana, a Israel? Ma tatinsach tab'i' jo' xinb'aanu re li tenamit Admá malaj tinb'aanu ta aawe jo' xinb'aanu reheb' laj Seboín xb'aan li xmaa'usilaleb'? Q'axal nayot'e'k li waanm ut namayok lynch'ool chawix.

Juan 3:16 “Xb'aan naq li Yos k'ajo' naq kixra li ruuchich'och': kixk'e chaq li Ralal jun chirib'il re naq chixjunil li taapaab'anq re, ink'a' taasachq, wanq b'an xyu'am chi junelik.

Isaías 49:15,16 Ab'anan, ma wank tab'i' junaq na'b'ej nasachk sa' xch'ool li xk'uula'al malaj naxkanab' xraab'al li tz'aqal ralal? Us ta jo'kan naxb'aanu junaq na'b'ej, a'ut laa'in ink'a' tatinsach sa' inch'ool. 16 K'e reetal naq sa' li wuq' tz'iib'anb'ilat, junelik yookin chi rilb'aleb' laasuttz'akil.

Isaías 41:13 Xb'aan naq laa'in li Qaawa', laa'Yos, chapchookat chawuq' inb'aan. Laa'in ninyehok aawe: “Matxiwak, laa'in nintenq'ank aawe”.

Mateo 28:20 ut k'utumaq chiruheb' xpaab'ankil chixjunil li xexintaqla wi'. Chenawaq naq laa'in wanqin eerik'in chixjunil li kutan toj sa' roso'jik li

ruuchich'och'.

Juan 14:1 "Misachk eech'ool chi k'oxlak. Chepaab' li Yos ut chineepaab' ajwi' laa'in.

Isaías 41:14 Matxiwak, a Jakob, mich'inank aach'ool, a Israel: us ta jwal kach'inat ut maak'a' aametz'ew, laa'in nintenq'ank aawe -chan li Qaawa'-. Laa'in, li xSant laj Israel, laj Kolol aawe.

Isaías 43:2 Wi tatnume'q sa' ha', tatwochb'eeni; wi taaq'ax junaq nima', ink'a' tatxk'am li roqha'; wi ut tatnume'q sa xam, ink'a' tatk'atq, chi moko taaletzq li raq' xam chawix.

Salmos 23:1-6 Xsaalm laj David. Li Qaawa' a'an laj k'aak'alehom we: maak'a' taamajelo'q chiwu. 2 Nikinxk'e chi hilank sa' raxil pach'aya', nikinxk'am b'arwi' wank li tuqtuukil ru ha': 3 naxk'e wi' chik inmetz'ew. Nikinxb'eres sa' li tiikil b'e sa' xk'ab'a' xnimal li xraham. 4 Us ta tinnume'q chiru q'oqyinkil taq'a, maak'a' k'aru tinxiwa laa'in, xb'aan naq wankat wik'in, at Qaawa'; laab'aar ut laaxuq' neke'xk'ojob' inch'ool. 5 Nakak'uub' jun li meex cho'q we chiruheb' li xik' neke'ilok we; ut nakayul linjolom rik'in sununkil b'an. K'ajo' naq natz'iptz'otk xsa' linsek'! 6 Relik chi yaal naq sahilal ut usilal taa'ochb'eeninq we chiru chixjunil linyu'am. Linmuheb'aal a'anaq rochoch li Qaawa' junq'e junq'e kutan.

Juan 14:27 "Li tuqtuukil usilal ninkanab' eerik'in, lintuqtuukil usilal nink'e eere; ink'a' nink'e eere kama' naxk'e li ruuchich'och'. Misachk eech'ool chi k'oxlak, chi moko chexxiwaq.

Filipenses 4:7 Ut li tuqtuukil usilal li nachalk rik'in li Yos ut naxq'ax ru chixjunil li na'leb', tixk'uula leech'ool ut leek'a'uxl rik'in li Kristo Jesus.

Proverbios 3:24 Maak'a' taaxiwa naq tatyoklaaq; ut naq akaq xatsotlaak, sa tatwarq.

Salmos 4:9 Sa' tuqtuukil usilal ninyoklaak ut sa' junpaat ninwark, xb'aan naq ka'ajwi' laa'at, at Qaawa', nakatk'ehok we chi wank sa' tuqtuukilal.

Salmos 33:18 Ab'an li Qaawa' naxk'aak'aleheb' li neke'xiwank ru, eb' li wankeb' royb'enihom rik'in li xraham,

Romanos 5:2 Xb'aan A'an, rik'in li paab'aal, xqataw qokik sa' li usilal a'in li wanko wi', ut naqanima qib' rik'in royb'eninkil li xnimal xloq'al li Yos.

Isaías 55:12 K'ajo'aq xsahil eech'ool naq tex'elq Babilonia; sa' tuqtuukilal texk'ame'q chaq wi' chik sa' leena'aj. Naq eb' li tzuul ut eb' li b'ool texrileb' chi chalk, te'xjap re chi b'ichank, ut chixjunileb' li k'iche' te'xpoq'poq'i li ruq'eb' cherilb'al.

Juan 16:22 Jo'kan ajwi' laa'ex ra sa' eech'ool anaqwan, ab'anan tolwil wi' chik eeru ut taasaho'q leech'ool, ut li xsahil eech'ool maa'ani truuq taamaq'oq cheru.

Lucas 12:9 Ab'an li taatz'eqtaanang we chiruheb' li tenamit, taatz'eqtaanaaq ajwi' a'an chiruheb' li x'ánjel li Yos.

Mateo 10:30 Ut laa'ex, toj ajlanb'ileb' chixjunil li rismal leejolom!

Isaías 54:10 Us ta eb' li tzuul te'xjal li xna'ajeb' ut eb' li b'ool te'juk'e'q, ab'an linrahom ink'a' taanajto'q aawik'in, chi moko taasachq xwankil li Sumwank xink'ojob' aawik'in re wank sa' tuqtuukilal", chan li Qaawa' li na'uxtaanank aawu.

Mateo 11:28-30 "Chalqex wik'in chejunilex li lub'luukex ut tawajenaqex xb'aan leeriiq, ut laa'in texinhiltasi. 29 Chek'ulub'a linchaq'rab' nink'e sa' eeb'een ut tzolomaq eerib' wik'in, xb'aan naq tuulanin ut q'un lynch'ool, ut sa texwanq. 30 Xb'aan naq li k'aru nekexintaqla wi' moko ra ta, ut li nink'e cheriiqani moko aal ta".

Cantares 2:10 Xtikib' aatinak linrahom ut xye we: "Xaqlin, at inrahom, k'ajo' xchaq'al aawu; kim wik'in.

Oseas 2:14,19,20 "Jo'kan naq tinq'unb'esi li xch'ool: tink'am sa' li chaqich'och' ut tinye re naq q'axal ninra. 19 Laa'in tatink'am wik'in chi junajwa; ut laa'ataq li wixaqil sa' tiikilal ut jo' aak'ulub', xb'aan naq nawil xtoq'ob'aal aawu ut jwal nakatinra. 20 Tatink'am wik'in rik'in chaab'ilal ut aran taanaw naq laa'in li Qaawa' laaYos.

Éxodo 3:14 Kichaq'ok li Yos ut kixye re laj Moisés: "Laa'in li Laa'inin". Ut kixye ajwi': "Jo'ka'in taaye reheb' laj Israel: «Laa'inin xtaqlank chaq we eerik'in»".

Oseas 13:4 Xyehom li Qaawa': "Laa'in li Qaawa' laaYos, chalen chaq sa' laawelik Ejipt. Maak'a' junaq chik yos chiwu laa'in, chi moko wank junaq chik aj kolonel.

Juan 15:14 Laa'ex li wamiiw wi nekeb'aanu li nekexintaqla wi'.

Juan 14:6 Kixye li Jesus re: —Laa'in li b'e, li yaal ut li yu'am. Maa'ani naxik rik'in li Yuwa'b'ej, wi ink'a' ta sa' ink'ab'a'.

Apocalipsis 3:20 «K'e reetal, wankin arin ut yookin chi toch'ok re li kab'l: wi ani taa'ab'inq re xyaab' linkux ut tixte li okeb'aal, tin'ok ut tintzekanq rik'in ut a'an wik'in.

Pastor T. John Franklin
Church of Salvation, Healing, and Deliverance
COS-HAD.org